

涵芬樓古今文鈔

呂景端
書藏

函卷經書全文鈔

卷一

涵芬樓古今文鈔卷三十五

賦

奏議類

表二

論宜敦禮讓表

庾峻

文

定諸葛亮故事表

陳壽

勸進表

劉琨

爲吳令謝詢求爲諸孫置守冢人表

張俊

讓中書令表

庾亮

薦譙元彥表

桓溫

解尚書表

殷仲文

爲宋公至洛陽謁五陵表

傅亮

爲宋公求加贈劉前軍表

傅亮

上三國志注表

裴松之

爲齊明帝讓宣城郡公第一表

任昉

爲范尙書讓吏部封侯第一表

任昉

爲蕭揚州薦士表

任昉

爲褚諮議綦讓代兄襲封表

任昉

爲范始興作求立太宰碑表

任昉

輔政上銓序表

梁武帝

請徵補謝朓何胤表

梁武帝

爲王僧辨勸進梁元帝初表

沈炯

第二表

沈炯

第三表

沈炯

經通天臺奏漢武帝表

沈炯

請歸養表 沈炯

上撰定律章表 孔稚圭

陳時務表 韓麒麟

請收校典籍表 孫惠蔚

答宣武帝雞異表 崔光

請弛鹽禁表 甄琛

再上伐梁表 邢巒

功臣不死王事請門襲封表 庾信

爲晉陽公上玉律秤尺斗升表 庾信

齊王進白兔表 庾信

齊王進赤雀表 庾信

奉使鄴都上梁元帝表 徐陵

請開獻書表

牛弘

請抑損外戚權寵并乞佐外郡表

武平一

爲敬暉等論武氏宜削去王爵表

岑羲

進渾儀表

張說

進鬪羊表

張說

諫鑾駕親征表

蘇頌

請代李邕死表

孔璋

請行禮樂化導三事表

裴耀卿

辭容州表

元結

自陳訴表

郭子儀

論郊祭合設皇地祇表

賈曾

奉天論延訪朝臣表

陸贄

爲陳正卿進續尙書表

蕭穎士

爲東平薛太守進王氏瑞詩表

高適

進三大禮賦表

杜甫

爲并州長史張仁亶進九鼎銘表

吳少微

進張巡中丞傳表

李翰

論佛骨表

韓愈

爲裴相公讓官表

韓愈

潮州刺史謝上表

韓愈

請上尊號表

韓愈

獻事表

元稹

論諫職表

元稹

進通典表

杜佑

文字源流表 江式

進刑統表 竇儀

駕幸河北起居表 楊億

侍讀學士等請宮中侍讀表 晏殊

辭起復表 富弼

乞罷政事表 歐陽修

乞致仕表 歐陽修

乞致仕第二表 歐陽修

乞致仕第三表 歐陽修

進修新唐書表 歐陽修

代人乞出表 宋祁

代陳州章相公乞致仕第一表 宋祁

乞致仕表 張方平

進資治通鑑表 司馬光

奏乞致仕表 呂誨

進修南郊式表 王安石

乞皇帝御正殿復常膳表 王安石

第二表 王安石

乞罷政事表 王安石

乞退表 王安石

第二表 王安石

乞宮觀表 王安石

辭南郊陪位表 王安石

辭明堂陪位表 王安石

請皇帝罷謁太廟表 王珪

右僕射待罪表 蘇頌

尙書禮部元會奏天下祥瑞表 林希

免加右光祿大夫表 李清臣

免右僕射表 韓忠彥

進四明尊堯集表 陳瓘

進中興四將傳表 章穎

上熙宗尊號表 完顏宗幹

上世宗尊號表 完顏宗幹

左參政乞致仕表 趙秉文

涵芬樓古今文鈔卷三十五

侯官吳曾祺纂錄

奏議類

表二

論官敦禮讓表 庚峻

臣聞黎庶之性。人衆而賢寡。設官分職。則官寡而賢衆。爲賢衆而多官。則妨化。以無官而棄賢。則廢道。是故聖王之御世也。因人之性。或出或處。故有朝廷之士。又有山林之士。朝廷之士。佐主成化。猶人之有股肱心膂。共爲一體也。山林之士。被褐懷玉。太上棲於丘園。高節出於衆庶。其次輕爵服。遠耻辱。以全志。最下就列位。惟無功而能知止。彼其清劬足以抑貪汙。退讓足以息鄙事。故在朝之士。聞其風而悅之。將受爵者。皆恥躬之不逮。斯山林之士。避寵之臣。所以爲美也。先王嘉之。節雖離世而德合於主。行雖詭朝而功同於政。故大者有玉帛之命。其次有几杖。

之禮。以厚德載物。出處有地。旣廊廟多賢才。而野人亦不失爲君子。此先王之弘也。秦塞斯路。利出一官。唯有處士之名。而無爵列於朝者。商君謂之六竭。韓非謂之五蠹。時不知德。惟爵是聞。故閭閻以公乘侮其鄉人。郎中以上爵傲其父兄。漢祖反之。大暢斯否。任蕭曹以天下。重四皓於南山。以張良之勳。而班在叔孫之後。蓋公之賤。而曹相諮之以政。帝王貴德於上。俗亦反本於下。故田叔等十人。漢廷臣無能出其右者。而未嘗干祿於時。以釋之之貴。結王生之襪於朝。而其名愈重。自非主臣尙德兼愛。孰能通天下之志如此其大者乎。夫不革百王之弊。徒務救世之政。文士競智而務入。武夫恃力而爭先。官高矣。而意未滿。功報矣。其求不已。又國無隨才任官之制。俗無難進易退之恥。位一高。雖無功而不見下。已負敗而後見用。故因前而升。則處士之路塞矣。又仕者黜陟無章。是以普天之下。先競而後讓。舉世之士。有進而無退。大人溺於動俗。報政撓於羣言。衡石爲之失平。清濁安可復分。昔者先王患向之所以取天下者。今之爲弊。是故功成必改其物。業定

必易其教。雖以爵祿使下。臣無貪陵之行。雖以甲兵定功。主無窮武之悔也。臣愚以爲古者大夫七十懸車。今自非元功國老。三司上才。可聽七十致仕。則士無懷祿之嫌矣。其父母八十。可聽終養。則孝莫大於事親矣。吏歷試無績。依古終身不仕。則官無秕政矣。能小而不能大。可降還蒞小。則使人以器矣。人主進人以禮。退人以禮。人臣亦量能受爵矣。其有孝如王陽。臨九折而去官。潔如貢禹。冠一免而不著。及知止如王孫。知足如疏廣。雖去列位而居東野。與人父言依於慈。與人子言依於孝。此其出言合於國檢。危行彰於本朝。去勢如脫屣。路人爲之隕涕。辭寵如金石。庸夫爲之興行。是故先王許之而聖人貴之。夫人之性陵上。猶水之趣下也。益而不已必決。升而不已必困。始於匹夫行義不敦。終於皇輿爲之敗績。固不可不慎也。下人并心進趣。上宜以退讓去其甚者。退讓不可以刑罰使。莫若聽朝士時時從志。山林往往間出。無使入者不能復出。往者不能復反。然後出處交泰。提衡而立。時靡有爭。天下可得而化矣。

定諸葛亮故事表 陳壽

臣壽等言。臣前在著作郎。侍中領中書監濟北侯臣荀勗。中書令關內侯臣和嶠。奏使臣定故蜀丞相諸葛亮故事。亮毗佐危國。負阻不賓。然猶存錄其言。恥善有遺。誠是大晉光明至德。澤被無疆。自古以來。未之有倫也。輒刪除複重。隨類相從。凡爲二十四篇。篇名如右。亮少有逸羣之才。英霸之器。身長八尺。容貌甚偉。時人異焉。遭漢末擾亂。隨叔父玄避難荊州。躬耕於野。不求聞達。時左將軍劉備以亮有殊量。乃三顧亮於草廬之中。亮深謂備雄姿傑出。遂解帶寫誠。厚相結納。及魏武帝南征荊州。劉琮舉州委質。而備失勢衆寡。無立錐之地。亮時二十七。乃建奇策。身使孫權。求援吳會。權旣宿服仰備。又覩亮奇雅。甚敬重之。卽遣兵三萬人以助備。備得用與武帝交戰。大破其軍。乘勝克捷。江南悉平。後備又西取益州。益州旣定。以亮爲軍師將軍。備稱尊號。拜亮爲丞相錄尙書事。及備殂沒。嗣子幼弱。事無巨細。亮皆專之。於是外連東吳。內平南越。立法施度。整理戎旅。工械技巧。物究

其極。科教嚴明。賞罰必信。無惡不懲。無善不顯。至於吏不容奸。人懷自厲。道不拾遺。疆不侵弱。風化肅然也。當此之時。亮之素志。進欲龍驤虎視。苞括四海。退欲跨陵邊疆。震蕩宇內。又自以爲無身之日。則未有蹈涉中原。抗衡上國者。是以用兵不戢。屢耀其武。然亮才於治戎爲長。奇謀爲短。理民之幹。優於將略。而所與對敵。或值人傑。加衆寡不侔。攻守異體。故雖連年動衆。未能有克。昔蕭何薦韓信。管仲舉王子城父。皆忖己之長。未能兼有故也。亮之器能政理。抑亦管蕭之亞匹也。而時之名將。無城父韓信。故使功業陵遲。大義不及耶。蓋天命有歸。不可以智力爭也。青龍二年春。亮帥衆出武功。分兵屯田。爲久駐之基。其秋病卒。黎庶追思。以爲口實。至今梁益之民。咨述亮者。言猶在耳。雖甘棠之詠召公。鄭人之歌子產。無以遠譬也。孟軻有云。以逸道使民。雖勞不怨。以生道殺人。雖死不忿。信矣。論者或怪亮文彩不豔。而過於丁寧周至。臣愚以爲咎繇大賢也。周公聖人也。考之尙書。咎繇之謨略而雅。周公之誥煩而悉。何則。咎繇與舜禹共談。周公與羣下矢誓故也。

亮所與言。盡衆人凡士。故其文指不得及遠也。然其聲教遺言。皆經事綜物。公誠之心。形於文墨。足以知其人之意理。而有補於當世。伏惟陛下邁蹤古聖。蕩然無忌。故雖敵國誹謗之言。咸肆其辭。而無所革諱。所以明大通之道也。謹錄寫。上詣著作。臣壽誠惶誠恐。頓首頓首。死罪死罪。

勸進表 劉琨

建興五年三月癸未朔十八日辛丑。使持節散騎常侍都督河北并冀幽三州諸軍事領護軍匈奴中郎將司空并州刺史廣武侯臣琨。使持節侍中都督冀州諸軍事撫軍大將軍冀州刺史左賢王渤海公臣禪。頓首死罪上書。臣琨臣禪頓首頓首。死罪死罪。臣聞天生蒸民。樹之以君。所以對越天地。司牧黎元。聖帝明王。鑒其若此。知天地不可以乏饗。故屈其身以奉之。知黎元不可以無主。故不得已而臨之。社稷時難。則戚藩定其傾。郊廟或替。則宗哲纂其祀。所以弘振遐風。式固萬世。三五以降。靡不由之。臣琨臣禪頓首頓首。死罪死罪。伏惟高祖宣皇帝肇基景

命世祖武皇帝遂造區夏。三葉重光。四聖繼軌。惠澤侔於有虞。卜年過於周氏。自元康以來。艱禍繁興。永嘉之際。氛厲彌昏。宸極失御。登遐醜裔。國家之危。有若綴旒。賴先后之德。宗廟之靈。皇帝嗣建。舊物克甄。誕授欽明。服膺聰哲。玉質幼彰。金聲夙振。冢宰攝其綱。百辟輔其治。四海想中興之美。羣生懷來蘇之望。不圖天不悔禍。大災荐臻。國未忘難。寇害尋興。逆胡劉曜。縱逸西都。敢肆大羊。凌虐天邑。臣等奉表使還。仍承西朝。以去年十一月不守。主上幽劫。復沈虜庭。神器流離。再辱荒逆。臣每覽史籍。觀之前載。厄運之極。古今未有。苟在食土之毛。含氣之類。莫不叩心絕氣。行號巷哭。況臣等荷寵三世。位厠鼎司。承問震惶。精爽飛越。且悲且惋。五情無主。舉哀朔垂。上下泣血。臣琨臣瑒。頓首頓首。死罪死罪。臣聞昏明迭用。否泰相濟。天命未改。厯數有歸。或多難以固邦國。或殷憂以啓聖明。齊有無知之禍。而小白爲五伯之長。晉有驪姬之難。而重耳主諸侯之盟。社稷靡安。必將有以扶其危。黔首幾絕。必將有以繼其緒。伏惟陛下。玄德通於神明。聖姿合於兩儀。應命